



## 謠言弄天个網路世界

佢幾下年前開始用智慧型手機仔，除核電話同簡訊个功能，也做得上網，隨時就做得看電子郵件、看社群聯絡个軟體。蓋像同朋友無時間、空間个分隔，毋使一秒鐘，消息就黏時傳分別人地。就因為佢方便，有兜人接收著訊息，無經過查證，好心好意又傳分好朋友，無正確个訊息就在網路世界傳來傳去，造成盡多人緊張、擔心，也造成盡多誤解。

佢識收過朋友傳來个訊息，講健保局寄出來个繳費單仔係假个，又有講引擎(en' jin')个燃料稅金單乜係假个，去納就分人騙地。該站仔佢也堵好收著燃料稅愛補納个單仔，因為佢个引擎盡舊地，盡久都無在騎，也盡久都無去繳稅。恁著分政府查著愛補稅，實在瀉面皮，就共快去繳核。過幾日仔收著這條訊息，心肝肚蓋懊惱(au nau)，又毋甘願承認自家恁戇分人騙。

又有一個講血壓高係一種症頭，毋係正經發病，做得用年紀去推算應該个血壓，故所老人家个血壓過高係正常个，毋怕。像佢阿姆這片个親戚，就有高血壓个種草，佢也驚會遺傳著，到這個歲數，都蓋注意食東西莫忒油、忒鹹，也盡量養成運動个好習慣。係準講佢相信這個講法，又開始大魚大肉，任在佢血壓飆高，哪日仔噉腦筋就莫怨別人。

過來就像食品安全个問題，有一條講煮好个雞卵，卵黃外背有一息仔青灰青灰，就係有毒；又有一條講弓蕉頭尾青青，食落去會得著癌症；還講包粟同番薯仔射藥仔射盡賣，絕對莫買來食；又講番樣、黃梨、葡萄催熟个農藥有毒；咁忒多乳茶會腰仔結石；最近流行講南洋鯽有病毒，無人敢買，魚攤仔个頭家叫苦連天！講到底，噯無一項東西做得食落肚地。

得人驚个訊息講核，另外，又還有分人感覺有特殊治療效果个訊息。像食蓮花做得醫好癌症；咁馬鈴薯个水頭那毛會變烏；食老薑嫩做得清肺部；咁冰過个高粱酒會過行血、毋會得癌；弓蕉皮搓搓啊會減少老人斑；用麻油塗圓身就可以預防蚊仔叮；食个東西跌落地泥，動作過遽啊三秒間撿起來就毋會有細菌。看核這兜訊息，人生又蓋有希望地正得！

頂頂恁多个訊息，到底係真也係假？其實都係網路謠言，或者係無經過研究證明、無科學根據个。行政院網站有一個「闢謠專區」，聽著个訊息係有疑狐，做得去查證，正毋會畀騙到捩捩轉。也愛記得，莫將網路世界毋著个謠言又寄分別人哦！

作者：吳秀梅

### ☆詞彙學習☆

- 【弄天】nung tien'：滿天，形容非常極致。      【瀉面皮】xia mien pi'：丟臉。  
 【黏時】liam' sii'：立刻、馬上。      【噉腦筋】biag no' gin'：腦中風。  
 【引擎】en' jin'：摩托車。      【番樣】fan' son：芒果。  
 【該站仔】ge cam e'：那陣子、那時候。      【南洋鯽】nam' iong' jid'：吳郭魚。

### ☆文法學習☆

- 【過遽啊】go giag` a：(再)快一點。此處的「過」為「較」的意思，是指程度更高、更多。  
 「啊」則相當於國語「一些、一點」之義，接在形容詞之後，表示程度變換的量。